

15. október. 2010

Ríkisstjórnin víki takist ekki að leiða þjóðina úr efnahagsgöngum

Kjaramálaráðstefna Samiðnar haldin á Grand hótél 15.október 2010 lýsir miklum vonbrigðum með hvað hægt hefur gengið að finna ásættanlegar lausnir fyrir skuldsett heimili og fyrirtæki. Hvað hægt gengur að fá niðurstöðu varðandi gengistryggð lán og hvernig það svigrúm til lækkunar skulda sem varð til við yfirfærslu frá eldri bönkunum til þeirra nýju hefur verði nýtt.

Langvarandi óvissa dregur kjarkinn og kraftinn úr þjóðinni til að takast á við þau krefjandi verkefni sem við blasa og snúa vörn í sókn og hefja endurreisn íslensks efnahagslífs. Hver mánuður sem fer í bið eykur á vanda þjóðarinnar og skerðir lífskjörin í landinu til langrar framtíðar.

Samiðn varar eindregið við hugmyndum um almennar niðurfærslur skulda sem fela það í sér að lífeyrisþegar þurfa að bera stærstan hluta kostnaðarins. Í því sambandi er rétt að benda á að flestir almennu sjóðirnir hafa neyðst til að skerða réttindi sjóðsfélaga á sama tíma og lög kveða á um að opinberu sjóðunum skuli bætt tapið.

Forsendur þess að hér á landi verði viðsnúningur eru auknar fjárfestingar í atvinnulífinu. Ekki er hægt að gera ráð fyrir að hið opinbera leggi mikið af mörkum í þeim efnum vegna mikillar skuldsetningar. Auknar fjárfestingar eru forsenda aukins hagvaxtar, fjölgun starfa og að okkur takist að vinna bug á atvinnuleysinu.

Að vinna bug á afleiðingum bankakreppunnar er stærra verkefni en svo að ríkisstjórnin ein og sér valdi því. Til að það takist þarf að skapa samstöðu í samfélaginu um þær sársaukafullu aðgerðir sem nauðsynlegt er að grípa til.

Stöðugleikasáttmálinn var tilboð aðila vinnumarkaðarins til ríkisstjórnar og sveitarfélaga um samstarf, um samræmdar aðgerðir til að snúa vörn í sókn. Samiðn lýsir yfir miklum vonbrigðum með að ekki tókst að halda áfram því samstarfi sem stöðugleikasáttmálinn byggði á og lýsir ábyrgðinni á hendur ríkisstjórninni þar sem mikið skorti á að hún stæði við gefin fyrirheit m.a um átak í atvinnumálum.

Við þessar aðstæður ganga íslensk stéttarfélag til samninga um endurnýjun kjarasamninga. Með hvaða hætti verður staðið að þeim mun ekki síst ráðast af stjórn málaástandinu í landinu og hversu líklegt það er að stjórnvöld séu að ná tökum á þeim vanda sem þjóðin stendur frammi fyrir.

Ríkisstjórnin hefur einangrast vegna skorts á samstarfsvilja og sundurlyndi ríkisstjórnar meirihlutans. Óábyrg stjórnarandstaða hefur spilað á sundurlyndið, tafið mál og komið í veg fyrir að mikilvæg mál nái fram að ganga.

Ísland er á barmi gjaldsþrots og við slíkar aðstæður verða stjórnendur landsins að sýna samstarfsvilja, ábyrgð, festu og víkja sérhagsmunum til hliðar.

Samiðn gerir þær kröfur til ríkisstjórnarinnar og Alþingis hún sýni með ótvíræðum hætti á næstu dögum að hún hafi styrk og vilja til að leiða Ísland út úr efnahagsvandnum. Takist það ekki ber ríkisstjórninni að víkja.